



Aðildarfélög KSÍ
b.t. formanna/framkvæmdastjóra

Reykjavík, 15. maí 2020

Félagaskiptatímabil 2020, samningar leikmanna o.fl. vegna breytinga á mótahaldi

Ágætu félagar,

Á fundi stjórnar KSÍ 14. maí sl., samþykkti stjórn tímabundnar breytingar á reglugerð KSÍ um félagaskipti, samninga og stöðu leikmanna og félaga vegna keppnistímabilsins 2020. Snúa þær breytingar í meginatriðum að reglum um félagaskipti og samninga leikmanna og félaga.

Ljóst er að keppnistímabilið 2020 hefur tekið breytingum af völdum Covid-19 veirunnar. Af þeim ástæðum hefur þurft að gera tímabundnar breytingar á tilteknum ákvæðum í reglugerð um félagaskipti, samninga og stöðu leikmanna og félaga. Um ræðir ákvæði sem snerta:

1. Keppnistímabilið 2020.
2. Félagaskiptatímabilin 2020.
3. Opinberir knattspyrnuleikir í deildarbikarkeppni karla og kvenna árið 2020.
4. Félagaskipti ósamningsbundinna leikmanna yngri flokka.
5. Samningar leikmanna sem renna út haustið 2020 og samningar leikmanna við ný félög.

Breytingar er varða keppnistímabilið 2020 og félagaskiptatímabilin 2020 eru gerðar með fyrirvara um endanlegt samþykki FIFA.

Eftirfarandi er yfirlit og samantekt yfir breytingarnar:

Breytingar sem samþykktar hafa verið eru **grænmerktar**.
Það sem samþykkt hefur verið að falli út er **rauðmerkt** og **yfirstrikað**.

REGLUGERÐ KSÍ

um félagaskipti, samninga og stöðu leikmanna og félaga

1. Keppnistímabilið 2020

Eftirfarandi hugtök er notuð í reglugerðinni og ber að leggja neðangreindan skilning í þau:

11. *Keppnistímabil: Keppnistímabilið á Íslandi, sem telst standa frá 1. febrúar til 15. október.*
Ákvæði til bráðabirgða 2020
Keppnistímabil 2020: Keppnistímabilið á Íslandi, sem telst standa frá 1. febrúar til 15. nóvember.

Samantekt:

Keppnistímabilið er skilgreint í reglugerð sem tímabilið frá 1. febrúar til 15. október ár hvert. Ljóst er að framlengja þarf keppnistímabilið 2020 þar sem mótahald kemur til með að ná fram yfir 15. október þetta árið. Varlegast þykir að framlengja keppnistímabilið til 15. nóvember 2020 í ljósi þess að skipulagðir leikir á vegum KSÍ munu að óbreyttu ná fram í byrjun nóvember.

2. Félagaskiptatímabilin 2020

Eftirfarandi hugtök er notuð í reglugerðinni og ber að leggja neðangreindan skilning í þau:

10. *Félagaskiptatímabil: Tímabilin 21. febrúar - 15. maí annars vegar og 1. júlí - 31. júlí hins vegar.*
Ákvæði til bráðabirgða 2020
Félagaskiptatímabil 2020: Tímabilin 22. febrúar – 17. apríl, 3. júní til 30. júní og 5. ágúst – 1. september.

10. gr.
Félagaskipti

- 10.1.2. Leikmaður getur aðeins gengið til liðs við íslenskt félagslið á tímabilinu 21. febrúar – 15. maí ár hvert, eða á tímabilinu 1. – 31. júlí. Leikmaður getur þó aðeins einu sinni skipt um félag innanlands eftir að hafa leikið í Íslandsmóti eða bikarkeppni KSÍ á almanaksárinu nema þegar um er að ræða félagaskipti leikmanns í 4. aldursflokki eða yngri sbr. grein 10.1.4.

Ákvæði til bráðabirgða 2020

10.1.2.1. Árið 2020 getur leikmaður aðeins gengið til liðs við íslenskt félagslið á tveimur tímabilum, hið fyrra á tímabilinu 22. febrúar – 17. apríl og 3. júní – 30. júní og hið síðara á tímabilinu 5. ágúst – 1. september.

16. gr.
Tímabundin félagaskipti

- 16.3. Lágmarkstími tímabundinna félagaskipta er á milli tveggja félagaskiptatímabila.–Leikmaður sem hefur fengið tímabundin félagaskipti með lokadagsetningu frá og með 1. ágúst fær keppnisleyfi með samningsfélagi sínu að nýju 16. október sama ár. Hámarkstími tímabundinna félagaskipta skal vera 12 mánuðir en lokadagsetning skal eigi vera síðar en 15. október. Í slíku tilfalli skal það gert með tilkynningu um félagaskipti. Tilkynning um tímabundin félagaskipti jafngildir tilkynningu um félagaskipti bæði við upphaf láns og í lok lánstíma.

Ákvæði til bráðabirgða 2020

16.3.1. Leikmaður sem hefur fengið tímabundin félagaskipti með lokadagsetningu frá og með 2. september 2020 fær keppnisleyfi með samningsfélagi sínu að nýju 16. nóvember sama ár.

19. gr.
Almenn ákvæði

- 19.6. Félagaskipti samningsbundinna leikmanna til landsins eru aðeins heimil á tímabilinu 21. febrúar - 15. maí ár hvert og á tímabilinu 1. - 31. júlí.

Ákvæði til bráðabirgða 2020

19.6.1. Félagaskipti samningsbundinna leikmanna til landsins árið 2020 eru aðeins heimil á tveimur tímabilum, hið fyrra á tímabilinu 22. febrúar – 17. apríl og 3. júní – 30. júní og hið síðara á tímabilinu 5. ágúst – 1. september.

Samantekt:

Leikmaður getur aðeins gengið til liðs við íslensk félagslið á tveimur tímabilum. Hið fyrra hefur verið á tímabilinu 22. febrúar til 15. maí og hið síðara 1. júlí til 31. júlí. Ljóst var gera þyrfti breytingar þessum tímabilum vegna seinkunar á mótahaldi. Fyrri tímabilinu var lokað tímabundið þann 17. apríl sl. þegar fjórar vikur (28 dagar) voru eftir. Samþykkt hefur verið að þeir 28 dagar verði nýttir og fyrri félagaskiptatímabilið verði opnað aftur þann **3. júní nk. og loki 30. júní**. Þannig mun opna fyrir félagaskipti tímanlega áður en fyrstu leikir í Bikarkeppni KSÍ hefjast og verður opið fram yfir a.m.k. fyrstu tvær umferðir í öllum deildum.

Þá hefur verið samþykkt að síðara félagaskiptatímabilið 2020 opni þann **5. ágúst nk. og loki þriðjudaginn 1. september**. Með þessu móti er síðari félagaskiptaglugginn opinn í fjórar vikur eða frá þeim tímapunkti er deildarkeppni er u.þ.b. hálfnuð.

3. Opinberir knattspyrnuleikir í deildarbikarkeppni karla og kvenna árið 2020

10. gr. Félagaskipti

10.1.1. Leikmaður getur mest verið skráður í þrjú félög á keppnistímabilinu. Á því tímabili er honum aðeins heimilt að taka þátt í opinberum knattspyrnuleikjum með tveimur félögum, sbr. þó ákvæði um 4. aldursflokk eða yngri í grein. 10.1.4. Undanþága skal veitt frá þessu þegar leikmaður skiptir um félag á milli landa, og keppnistímabil þeirra skarast þannig að í öðru landinu er tímabilið vor/haust en í hinu haust/vor. Þegar slíkt á við er leikmanni heimilt að leika í opinberum knattspyrnuleikjum með þremur félagsliðum á keppnistímabilinu svo fremi sem öðrum skuldbindingum sé fullnægt.

Ákvæði til bráðabirgða 2020

10.1.1.1. Hafi leikmaður tekið þátt í opinberum knattspyrnuleik/ knattspyrnuleikjum með félagi í deildarbikarkeppni karla eða kvenna á árinu 2020, skulu þeir leikir ekki gilda sem opinberir knattspyrnuleikir á keppnistímabilinu 2020 þar sem mótið var fellt niður.

Samantekt:

Almenna reglan er sú að leikmaður getur mest verið skráður í þrjú félög á hverju keppnistímabili. Á því tímabili er honum aðeins heimilt að taka þátt í opinberum knattspyrnuleikjum með tveimur félögum. Leikir í deildarbikarkeppni karla og kvenna gilda almennt sem opinberir knattspyrnuleikir þar sem um er að ræða skipulagða knattspyrnukeppni hjá KSÍ. Þar sem deildarbikarkeppni karla og kvenna var felld niður í ár sökum Covid-19 munu þeir leikir sem leiknir voru í mótinu í ár ekki gilda sem opinberir knattspyrnuleikir m.t.t. félagaskipta.

4. Félagaskipti ósammingsbundinna leikmanna yngri flokka

10. gr. Félagaskipti

10.1.3. Á öðrum tímabilum eru félagaskipti ekki heimil nema fyrir ósammingsbundna leikmenn í yngri aldursflokkum (innanlands og á milli landa).

Ákvæði til bráðabirgða 2020

10.1.3.1. Innlend félagaskipti ósammingsbundinna leikmanna í yngri flokkum árið 2020 skulu vera heimil frá 22. febrúar til 17. apríl og á tímabilinu 18. maí til 1. september.

Samantekt:

Samþykkt hefur verið að opna aftur fyrir félagaskipti ósammingsbundinna leikmanna yngri flokka þann 18. maí nk. og loki þann 1. september. Umrætt félagaskiptatímabil hefur verið opið frá 16. október ár hvert en hefur lokað þann 1. ágúst, eða á sama tíma og síðara félagaskiptatímabilið lokar hjá sammingsbundnum leikmönnum og í meistaraflokki.

5. Samningar leikmanna sem renna út haustið 2020 og samningar leikmanna við ný félög

14. gr.
Samningsgerð

Ákvæði til bráðabirgða 2020

- 14.13.1. Geri leikmaður leikmanns- eða sambandssamning við nýtt félag, skv. grein 14.13 á árinu 2020 [eftir að sex mánuður eru til loka samningstíma leikmanns hjá núverandi félagi], þá getur gildistími samnings leikmanns við nýtt félag eigi hafist fyrr en eftir lok keppnistímabils 2020.
- 14.13.2. Félagi og leikmanni sem gert hafa leikmanns- eða sambandssamninga sem falla úr gildi á tímabilinu 16. október til 14. nóvember 2020 er heimilt að framlengja gildistíma þeirra til loka keppnistímabils 15. nóvember 2020. Gildir þessi heimild þrátt fyrir að leikmaður hafi þegar gert samning við nýtt félag, enda eigi hinn nýji samningur að taka gildi eftir lok keppnistímabils 2020.

Samantekt:

Samþykkt hefur verið sú tímabundna breyting að geri leikmaður leikmanns- eða sambandssamning við nýtt félag, skv. grein 14.13 á árinu 2020 [eftir að sex mánuður eru til loka samningstíma leikmanns hjá núverandi félagi], þá getur gildistími samnings leikmanns við nýtt félag eigi hafist fyrr en eftir lok keppnistímabils 2020 (15. nóvember).

Þá hefur verið samþykkt að heimila félagi og leikmanni sem gert hafa leikmanns- eða sambandssamninga, sem falla úr gildi á tímabilinu 16. október til 14. nóvember 2020, sé heimilt að framlengja gildistíma þeirra til skamms tíma eða til loka keppnistímabils 15. nóvember 2020. Gildir þessi heimild þrátt fyrir að leikmaður hafi þegar gert samning við nýtt félag, enda eigi hinn nýji samningur að taka gildi eftir lok keppnistímabils 2020.

Ef frekari upplýsinga er óskað þá vinsamlegast hafið samband við undirritaðan.

Haukur Hinriksson

Haukur Hinriksson,
yfirlögfræðingur hjá KSÍ.